



Հովհաննես Թումանյան

Սուտիկ որսկանը

Հորս կնունքով, մորս ծնունդով, վեր կացանք մի օր հինգ ու վեց հոգով, թրով
թվանքով որսի գնացինք: Հաղին էր, Հյուղին էր, Չատին էր, Մատին էր, հերս էր,
ես էի . գնացինք որսի . . .

Սարեր, ձորեր դուզ գնացինք, որտեղ որս կար՝ սուսուփուս գնացինք, որտեղ ահ
էր՝ կուզեկուզ գնացինք . . .

Գնացի՛նք, գնացի՛նք, շատ թե քիչ, մին էլ տեսնենք երեք լիճ . երկուսը՝ ցամաք,
մնի մեջ էլ իսկի ջուր չկա: Մին էլ, ըհր՛, մտիկ տանք, որ էս անջուր լճում լողում
են, ճշում երեք հաստ սիպտակ բադ, երկուսը սատկած են, մինն էլ կենդանի չի:

Հաղի՛, տո՛ւր հա, տո՛ւր:

Թե՛ թվանք չունեն:

Հյուղի՛, տո՛ւր հա, տո՛ւր:

Ես էլ չունեն:

Չատի . . . Մատի . . .

Մենք էլ չունենք:

Բա ի՞նչ անենք . . .

Հորս ձեռին կարճ ու երկար, հաստ ու բարակ մի փետ կար . երեսն առավ, նշան դրեց, մին էլ տրա՛ք, որ կրակեց . . . Նա կրակեց, ես զարկեցի . որ զարկեցի՝ փռվեց էսպես, ամեն թևը հինգ գագ ու կես . . .

Հաղի, դանա՛կ . . .

Թե՛ դանակ չունենմ:

Հյուղի, դու . . .

— Ես էլ չունեմ . . . - Չատի՞, Մատի՞ . . .

- Մենք էլ չունենք:

- Բա ի՞նչ անենք . . .

Հերս էլ ունի, բերան չունի:

Էս անբերան դանակը քաշեցինք: Հաղին մորթեց, չկարաց . Հյուղին մորթեց, չկարաց, Չատին չկարաց, Մատին չկարաց, հերս էլ չկարաց, ես քաշեցի մորթեցի:

Մորթեցի, վեր գցեցի, բադ մի ասիլ, մի գոմեշ ասա: Հաղին շալակեց, չկարաց, Հյուղին շալակեց, չկարաց, Չատին չկարաց, Մատին չկարաց, հերս էլ չկարաց, ես շալակեցի: Շալակեցի, գնացինք:

Գնացինք, գնացինք, հասանք մի տեղ, մին էլ տեսնենք երեք գեղ, երկուսի տեղն իսկի չի երևում, մնումն էլ իսկի շենլիկ չկա: Էս անշեն գեղում դես ման եկանք, դեն ման եկանք, մի տուն գտանք, մեջը՝ երեք պատավ, երկուսը՝ մեռած, մնի բերնումն էլ շունչ չկա:

- Տղերք,- ասինք,- եկեք բադով փլավ անենք:

Էս անշունչ պատավը գնաց դես ման եկավ, դեն ման եկավ, կես բրինձ գտավ, երեք պղինձ, երկուսը՝ ծակ, մինն էլ իսկի տակ չունի:

Չորը լցրինք էս անտակ պղինձը, մեջը ածինք բաղն ու բրինձը, անկրակ եփեցինք: Եփեց, եփեց, միսն ու բրինձը գնացին, մնաց ջուրը:

Որսից եկած սոված մարդի՛կ, վրա եկանք, կերա՛նք, կերա՛նք . ոչ աչքերս բան տեսավ, ոչ բերաններս բան մտավ: